



ACHTE JOORGANG

FASNACHT 2005

D'Show vom Tut-ench-armun z'Basel isch e Renner – drotz em Fluuech Als Erschte kunnt vom Bundesroot dr H.-R. Merz uff Bsuech Wonner dr Saal bedritt kunnt schreiend dr Diräggtler anezschbringe «Halt, Stopp, d'Mumie mient er durch dr Lieferanddeygang bringe»

D'Ägypter hänn zem dooti Lyt als Mumie z'brebbariere S'Hirni miesse uftwändig dur d'Nase exdrahiere

Hätt dr Hakan Yakin domols gläbbd – das simmer uns im Glaare Hätt me sich dä Dail vom Yygriff sälbverständlich kenne spare

Wenn si das Krokodil gseht fyylt sich d'Basler SVP dehai

Wie bi däne Dier isch iri Schnuure gross und s'Hirni glai

Und d'Zanolari kennt noch irem Waalfrusch wider beschtiens penne Bi so kurze Bai kasch drum abgsäggti Hoose kuum erkenne

Vier Buschi – ai wie glatt isch das Regierigswaalblakaat

Zer Interpretation hämmer Vermuetige baraad

Wemme das gseht duet sich bi aim e Yydrugg ganz konkret verdricht

Das isch 's Resultat vom Christoph Eymaa syyne Frauengeschichte

Andersyts losst sich e Vatterschaft vom Bammatter usschliesse

Denn wär nur warmi Luft vo sich gilt wird kai Windle draage miesse

Vom Tschudi isch au sicher kains, mer miechte grad e Wett

Will jedes vo däne vier – ganz dytlig z'gseh – e Ruckgrat hett

Die vier Seil do uff däm Blakaat – das stoot fir all fesch

Sinn nid vom Conti – gsehnsch au ooni ghaima Vatteresch

Zmindesch isch 's Blakaat mit Abfallkibel nid ganz abverheit

Dodruff isch weenigschtens dr Uusgang vo de Waale brophzeit

D'Medieandschaft z'Basel isch allmählig am verwäase Die neil Baz ka bi dämm Niveau heggschtens no e Buschi läase Und wenn das Buschi glugst und schmatzt und lallt, denn hesch esoo No e Brogrammquerschnitt vo unsrem Radio Basilisk bikoo

Dr Daag isch koo zem Abschiid näe vom Schnitzelbangidol Drum saage mir ganz zärdlig: «Aadie HaMaTschu, läb wool!»

Zem Di eere stelle mir in Innehof an d'Roothuuswand E Bronzestatue vomme Fuuldier mit 'me Cüppli in dr Hand

Im Joggei-Bad hänn uns letschte Summer d'Mugge gstoche

Woo mer wild um uns gwait hänn hett uns e nätte Herr aagsproche

Är als Spillerjäger halg no nie so Fliegefänger gseh

Jetz simmer 's neie Goali-Trio fir dr FCB

None mängg 'Milliard' wird wiirgiglos im Swiss-Moloch versande

Wäg 'de Bonze-Leen fäält jetz dr Stutz zem do in Basel lande

Doch frooge mir graad use: Jä, wär steert sich denn do draa?

Myse Food und schlächte Service kasch au bim Mc Donalds haa

Dr Blocher kunnt nach Basel mit em Zug by Sturm und Rääge

Do schiff't's durch 's Dach uff syni Biire bi dr Basserelle-Stääge

Wo ihm die roschtig-bruuni Soosse aabe lauff froggd er diräggt:

«Git's jetz Gopfrildstutz in Basel au e Hirschhorn-Kunschbrofäggt?»

62 Millione Niete

Kaa sälbscht dr Aiffeldurm nid biete
Doch letscht Novämber – 's hett uns gschträht
Hänn so vyyl Labbi dr Bush gwählt

Worum hett er so dytlig gwunne?
Er hett sich uff d'Stammweeler bsunne
Und das wäre im Konkrete
Rassischte, Alkis und Broleete

In Sache Fraue wurd die Flusche
Am liebschte mit em Clinton dusche
Doch wo's en blutt gseht, maint d'Lewinski:
«Dä Aabligg kenn y syt em Kindsgi»

Du griegsch my au nid undre Schrybdisch
Will my Ränzli scho vyyl z'digg isch
Soowisoo beängts my sehr
Dert gneyled scho dr Tony Blair

S waichschti Volgg uff däre Ärde
Wott nomol vier Joor bschisse wärde
Und bim zfriide Bic Mac mampfe
Suecht me dr näggscht Find zem verstampfe

Dr Bush said: «S gitt do Terrorischte
Volggsverhetzer, Kommunischte
Y hass das US-findlig Gfasel
Killed die Schnitzelbänggler z'Basel!»

D'Frau Bush wo ire George duet kenne
Kunnt sofort mit em Atlas z'renne
Er said: «Kai Sorg, 's isch scho bassiert
Y ha das Schweede usradiert!»

Sy Gumsle maint: «Du bisch e Niete
Die Basler kennte so vyyl biete
Bim Waalbschiss hättisch nie me Bammel
Mit dr Hilf vom Walti Hammel

Fir neyschti Foltermittel z'teschte
Isch d'Hilf vom Schwyzerfäärnsee 's Beschte
Zem d Quaal verdopple – 's isch banal
Wär Lüthi & Blanc optimal

Die Situation kennt eskaliere
Wie sotti d'Schwyz druff reagiere?
S gitt nur ai Wäg us däre Noot:
Die Gsalzene in Bundesroot!